



Amaran!

Pihak Jabatan Agama Islam Perak tidak bertanggungjawab ke atas sebarang penambahan ayat selain daripada kandungan khutbah yang dikeluarkan.

“KEMERDEKAAN: NIKMAT YANG WAJIB DISYUKURI”

26 Ogos 2022 / 28 Muharram 1444

الْحَمْدُ لِلَّهِ¹ الَّذِي أَرْسَلَ رَسُولَهُ بِالْهُدَىٰ وَدِينِ الْحَقِّ، لِيُظْهِرَهُ عَلَى الدِّينِ كُلِّهِ وَكَفَىٰ بِاللَّهِ شَهِيدًا. أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ مُحَمَّدًا عَبْدُهُ وَرَسُولُهُ. اللَّهُمَّ صَلِّ وَسَلِّمْ عَلَى سَيِّدِنَا مُحَمَّدٍ² وَعَلَى آلِهِ وَأَصْحَابِهِ وَالتَّابِعِينَ لَهُمْ بِإِحْسَانٍ إِلَى يَوْمِ الدِّينِ. أَمَّا بَعْدُ، فَيَا عِبَادَ اللَّهِ! اتَّقُوا اللَّهَ³ وَأَوْصِيكُمْ وَآيَايَ بِتَقْوَى اللَّهِ فَقَدْ فَازَ الْمُتَّقُونَ.

Sidang Jumaat yang dirahmati Allah,

Marilah kita tingkatkan ketakwaan ke hadrat Allah SWT dengan melaksanakan segala perintah dan meninggalkan semua larangan Nya, mengikhhlaskan setiap amal, semoga kita sentiasa mendapat taufik dan hidayah serta diperkukuhkan iman mengabdikan diri semata-mata kepada Allah Yang Maha Esa. Menjelang sambutan Hari Kebangsaan, memperingati ulang tahun kemerdekaan negara kali ke-65 pada 31 hari bulan Ogos, mimbar akan membicarakan khutbah bertajuk:

“KEMERDEKAAN: NIKMAT YANG WAJIB DISYUKURI”

Firman Allah SWT:

﴿وَإِذْ قَالَ مُوسَىٰ لِقَوْمِهِ اذْكُرُوا نِعْمَةَ اللَّهِ عَلَيْكُمْ إِذْ أَنْجَاكُمْ مِنْ آلِ فِرْعَوْنَ يَسُومُونَكُمْ سُوءَ الْعَذَابِ وَيَدْبِحُونَ أَبْنَاءَكُمْ وَيَسْتَحْيُونَ نِسَاءَكُمْ وَفِي ذَٰلِكُمْ بَلَاءٌ مِّن رَّبِّكُمْ

عَظِيمٌ ﴿٦﴾

Maksudnya: Dan (ingatlah) ketika Musa berkata kepada kaumnya, “Ingatlah nikmat Allah ke atas mu ketika Dia menyelamatkan kamu dari pengikut-pengikut Fir’aun; mereka menyiksa kamu dengan seksa yang pedih, dan menyembelih anak-anak mu yang lelaki, dan membiarkan hidup anak-anak perempuan mu; pada yang demikian itu suatu ujian yang besar daripada Tuhan mu”. (Surah Ibrahim ayat 6)

¹ Memuji Allah

² Selawat ke atas Nabi Muhammad SAW

³ Pesan Taqwa



Jika kita menyelak lembaran sejarah, Melaka pada satu masa dahulu, ialah sebuah kerajaan yang hebat, melaksanakan pemerintahan yang adil berlandaskan adat setempat dan syariat Islam, serta berperanan sebagai pusat perdagangan yang menjadi tumpuan pedagang timur dan barat. Melaka berupaya mengalahkan angkatan laut Siam yang cuba menyerang; dan pernah menaungi Kerajaan Patani di selatan Siam. Melaka jatuh ke tangan Portugis bukan kerana kekuatan angkatan laut Portugis; tetapi kerana berlaku krisis dalaman, apabila sebahagian pembesar serta pembelot memilih untuk menyokong Portugis.

Bermula daripada penjajahan Portugis yang bertapak di Melaka pada 24 Ogos 1511, bertukar ke Belanda, disambut oleh Inggeris, dengan segala tipu muslihat berjaya meletakkan seluruh Tanah Melayu di bawah kuasa penjajah, dicuri seketika oleh Jepun semasa Perang Dunia Kedua, sebelum kembali berada di bawah jajahan Inggeris. Tanah Melayu melalui zaman penjajahan selama 446 tahun sebelum diisytiharkan sebagai sebuah negara merdeka bernama Persekutuan Tanah Melayu pada 31 Ogos 1957.

Jika disoroti dokumen perundangan, didapati faktor penentu kepada kemerdekaan dan penggubalan Perlembagaan Persekutuan sebenarnya berpaksikan persetujuan Raja-Raja Melayu, dengan persefahaman mahu mempersekutukan kuasa-kuasa Kerajaan Negeri Melayu dengan dua buah Negeri Selat bagi maksud membentuk sebuah kerajaan pusat yang kuat. Proses rundingan kemerdekaan bermula apabila rancangan Malayan Union dibatalkan. Asas pembinaan negara bangsa Tanah Melayu dilandaskan pada Perjanjian Negeri yang ditandatangani oleh sembilan orang Raja Melayu dengan Kerajaan British pada 21 Januari 1948. Perjanjian yang dipersetujui oleh Raja-Raja Melayu membuktikan jiwa besar Raja-Raja Melayu menyerahkan kedaulatan kuasa negeri kepada Persekutuan agar terbina sebuah negara bangsa dinamakan Persekutuan Tanah Melayu yang menggabungkan sembilan Negeri Melayu bersama dua Negeri Selat.

Muslimin yang dirahmati Allah,

Suara yang digemakan, gerakan yang dilaksanakan, hajat dan doa yang dipohonkan oleh rakyat di bumi ini, dimakbulkan oleh Allah SWT. Pada pagi 31 Ogos 1957, di hadapan sembilan Raja Melayu, Persekutuan Tanah Melayu dimasyhurkan sebagai sebuah negara merdeka oleh Tunku Abdul Rahman Putra (Almarhum), diikuti tujuh kali laungan MERDEKA, disusuli pengibaran bendera Persekutuan Tanah Melayu dan tembakan meriam. Kelahiran sebuah negara baru dilengkapi dengan laungan azan,



kemudiannya doa yang dipimpin oleh Syeikh Haji Ahmad bin Muhammad Said, Mufti Negeri Sembilan. Doa yang dibaca pada pagi pengisytiharan kemerdekaan mengandungi empat perkara utama:

Pertama: Pemimpin yang adil serta memelihara agama dan rakyat berteraskan undang-undang.

“Ya Allah! Anugerahkan taufik kepada sekalian pentadbir awam, jemaah Menteri, para Sultan dan Raja, serta pemimpin negara bagi memelihara kehendak-kehendak agama, memelihara hak keistimewaan umatnya, menegakkan keadilan dalam undang-undang dan berpegang kepada keindahan Islam”.

Kedua: Bangsa Melayu yang maju dan tidak sesat.

“Ya Allah! Jadikanlah mereka agen perubahan hal keadaan orang-orang Melayu, agar bangsa ini meningkat maju dan ke hadapan sehingga tercapai cita-cita yang diidam-idamkan.

Ya Allah! Bantulah bangsa Melayu, bimbinglah serta jadikanlah kami menjadi sebaik-baik manusia. Tunjukkanlah kami jalan yang lurus, jalan yang telah Engkau kurniakan kepada umat Islam yang telah menikmatinya, bukan sebagaimana orang yang Engkau murkai dan bukan orang yang sesat”.

Ketiga: Kesejahteraan hidup, keharmonian kaum.

“Ya Allah! Hindarilah kami daripada sebarang kesusahan, sejahterakanlah kami daripada segala yang boleh memudaratkan, peliharalah kami daripada segala buruk lagi keji dan tunaikanlah segala yang diharap dan dihajati.

Harmonikanlah antara kami dan bangsa lain selain kami, hingga kami sentiasa dalam keamanan dan keselamatan. Bebaskanlah kami dengan segera daripada segala kepayahan dengan rahmat Mu wahai Tuhan yang Maha Murahmat segalanya yang penyayang”.

Keempat: Keselamatan Negara serta peringatan tidak bersifat melampau dan melakukan kerosakan.

Ya Allah! Jadikanlah bagi bangsa kami, kaum yang lain dan negara ini, penjaga daripada segala bala, yang menghalang kami dan mereka daripada sebarang pencerobohan. Bantulah kami menewaskan segala musuh dan orang yang dengki. Zahirkanlah kemarahan Mu dan kemurkaan Mu kepada orang yang melampau dan yang melakukan kerosakan.



Dalam suasana menyambut Hari Kebangsaan memperingati ulang tahun kemerdekaan, generasi hari ini wajar melawati dan menghayati doa yang dipohon kepada Allah SWT, sebaik negara diisytiharkan sebagai sebuah negara merdeka, 65 tahun yang lalu. Mimbar ingin memperingatkan;

Pertama: Rakyat menghargai dan menghayati erti kemerdekaan dan bersungguh-sungguh berusaha mempertahankannya; bertindak segera dan tegas membanteras sebarang perbuatan khianat agar peristiwa sedih kejatuhan Kerajaan Melaka tidak berulang.

Kedua: Kemerdekaan merupakan antara nikmat terbesar kerana kemerdekaan membolehkan kita sendiri mentadbir urus negara untuk mencipta kejayaan dan mencapai kegemilangan.

Ketiga: Mengambil tanggungjawab secara bersama memperkukuhkan kesatuan ummah juga menjalinkan kerjasama dengan seluruh warga Malaysia dengan menghayati semangat “Bersatu teguh, bercerai roboh”.

Keempat: Menghargai dan tidak melupakan jasa para pejuang kemerdekaan sama ada yang berjuang menentang penjajahan secara keras berkonfrontasi hingga dipenjarakan dan ada yang terkorban nyawa, begitu juga yang gigih memikirkan strategi dan mengusahakan perundingan sehingga tercapainya kemerdekaan.

Kelima: Mengisi kemerdekaan berlandaskan syariat dan nilai-nilai Islam agar terbina sebuah negara yang mendapat keredaan dan rahmat Illahi.

بَارَكَ اللَّهُ لِي وَلَكُمْ بِالْقُرْآنِ الْعَظِيمِ وَنَفَعَنِي وَإِيَّاكُمْ بِمَا فِيهِ مِنَ الْآيَاتِ وَالذِّكْرِ الْحَكِيمِ
وَتَقَبَّلَ مِنِّي وَمِنْكُمْ تِلَاوَتَهُ إِنَّهُ هُوَ السَّمِيعُ الْعَلِيمُ. أَقُولُ قَوْلِي هَذَا وَأَسْتَغْفِرُ اللَّهَ
الْعَظِيمَ لِي وَلَكُمْ وَلِسَائِرِ الْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ الْأَحْيَاءِ مِنْهُمْ
وَالْأَمْوَاتِ فَاسْتَغْفِرُوهُ إِنَّهُ هُوَ الْعَفُورُ الرَّحِيمُ.

Khutbah Kedua

الْحَمْدُ لِلَّهِ⁴ حَمْدًا يُؤَافِي نِعْمَهُ وَيُكَافِي مَزِيدَهُ. أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ،
وَأَشْهَدُ أَنَّ سَيِّدَنَا مُحَمَّدًا عَبْدُهُ وَرَسُولُهُ. اللَّهُمَّ صَلِّ وَسَلِّمْ عَلَى سَيِّدِنَا مُحَمَّدٍ⁵ وَعَلَى آلِهِ
وَأَصْحَابِهِ أَجْمَعِينَ. أَمَّا بَعْدُ، فَيَا عِبَادَ اللَّهِ! اتَّقُوا اللَّهَ⁶ وَكُونُوا مَعَ الصَّادِقِينَ.

Muslimin yang dirahmati Allah,

Mimbar menyeru para jemaah agar tetap berpegang kepada aqidah Islamiah berteraskan Ahli Sunnah Waljamaah, yang menjadi warisan Rasulullah SAW, sahabat dan tabiin. Jagalah hubungan dengan Allah SWT dan sesama manusia. Makmurkan rumah-rumah Allah dengan istiqamah mengerjakan ibadah, terutama solat fardu berjemaah. Perbanyakkan selawat dan salam ke atas Junjungan Besar Nabi Muhammad SAW.

إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ ءَامَنُوا صَلُّوا عَلَيْهِ وَسَلِّمُوا تَسْلِيمًا⁷
اللَّهُمَّ صَلِّ عَلَى مُحَمَّدٍ وَعَلَى آلِ مُحَمَّدٍ كَمَا صَلَّيْتَ عَلَى إِبْرَاهِيمَ وَعَلَى آلِ إِبْرَاهِيمَ
وَبَارِكْ عَلَى مُحَمَّدٍ وَعَلَى آلِ مُحَمَّدٍ كَمَا بَارَكْتَ عَلَى إِبْرَاهِيمَ وَعَلَى آلِ إِبْرَاهِيمَ فِي
الْعَالَمِينَ إِنَّكَ حَمِيدٌ مَجِيدٌ. اللَّهُمَّ اغْفِرْ لِلْمُسْلِمِينَ وَالْمُسْلِمَاتِ وَالْمُؤْمِنِينَ
وَالْمُؤْمِنَاتِ⁸، وَأَصْلِحْ ذَاتَ بَيْنِهِمْ وَأَلِّفْ بَيْنَ قُلُوبِهِمْ وَاجْعَلْ فِي قُلُوبِهِمُ الْإِيمَانَ
وَالْحِكْمَةَ، وَثَبِّتْهُمْ عَلَى مِلَّةِ رَسُولِ اللَّهِ ﷺ.

⁴ Memuji Allah

⁵ Selawat ke atas Nabi Muhammad SAW

⁶ Pesan Taqwa

⁷ Ayat Al-Quran

⁸ Doa untuk Kaum Muslimin



Ya Allah! Ya Rabbal 'alamin!, lindungi negara kami sebagai sebuah negara yang merdeka lagi berdaulat, dilimpahi rahmat kemakmuran dan warganya hidup dalam suasana persaudaraan, saling menghormati kekal harmoni.

Ya Ghaffar! Ya Wahhab! limpahi ihsan Mu kepada para pejuang yang terkorban mempertahankan kedaulatan tanah air; tempatkan roh mereka bersama para syuhada yang dianugerahi kemuliaan.

Ya Mannan! Ya Razzaq!, berkatilah hamba Mu yang melaksanakan tuntutan zakat, wakaf dan sedekah. Kurniai mereka rezeki yang berlipat ganda, serta sucikanlah harta dan jiwa mereka; jauhi golongan *fuqara* dan *masakin* daripada kekufuran dan kefakiran yang berpanjangan.

Ya Dzal Jalaali wal Ikram!, jadikanlah kami antara hamba Mu yang memelihara amanah. Kuatkan iman kami agar menjauhi perbuatan khianat seperti salah guna harta benda bukan milik kami, memberi atau menerima rasuah, menyalahgunakan kuasa untuk kepentingan diri, serta jauhkan kami termasuk dalam golongan yang mengabaikan tanggungjawab yang diamanahkan.

Ya Maalikal Mulk!, jauhi negara kami daripada kehancuran disebabkan perbuatan rasuah; serahkan tanggungjawab pimpinan dan pengurusan negara kami kepada kalangan hamba Mu yang amanah dan ikhlas, serta tegas lagi berani menegakkan kebenaran dan melaksanakan keadilan berlandaskan hukum.

Ya Malik! Ya Hadi!, kurniakanlah taufik dan hidayah Mu terhadap raja kami, Duli Yang Maha Mulia Paduka Seri Sultan Perak Darul Ridzuan, Sultan Nazrin Muizzuddin Shah Ibni Almarhum Sultan Azlan Muhibbuddin Shah Al-Maghfur-Lah, dan Raja Permaisuri Perak Darul Ridzuan Tuanku Zara Salim serta kerabat diraja dan seluruh rakyat jelata.

رَبَّنَا آتِنَا فِي الدُّنْيَا حَسَنَةً وَفِي الْآخِرَةِ حَسَنَةً وَقِنَا عَذَابَ النَّارِ

فِيَا عِبَادَ اللَّهِ، ﴿إِنَّ اللَّهَ يَأْمُرُ بِالْعَدْلِ وَالْإِحْسَانِ وَإِيتَايَ ذِي الْقُرْبَىٰ وَيَنْهَىٰ عَنِ الْفَحْشَاءِ وَالْمُنْكَرِ وَالْبَغْيِ يَعِظُكُمْ لَعَلَّكُمْ تَذَكَّرُونَ﴾ فَادْكُرُوا اللَّهَ الْعَظِيمَ يَذْكُرْكُمْ، وَاشْكُرُوهُ عَلَىٰ نِعْمِهِ يَزِدْكُمْ، وَاسْأَلُوهُ مِنْ فَضْلِهِ يُعْطِكُمْ، وَلَذِكْرُ اللَّهِ أَكْبَرُ، وَاللَّهُ يَعْلَمُ مَا تَصْنَعُونَ.